

Morning Dogri (NSD) National News Bulletin 06-03-2025

आकाशवाणी

1. केन्द्र सरकारै सोनप्रयाग थमां केदारनाथ तोहड़ी 12 इशारिया 9 किलोमीटर लम्मे रोपवे दे विकास गी मंजूरी देई दित्ती ऐ।
2. प्रधानमंत्री नरेन्द्र मोदी होर अज्ज उत्तराखंड दा दौरा करडन ते इस मौके ओह मुखवा च पूजा-अर्चना बी करडन।
3. विदेश मंत्री डाक्टर एस. जयशंकर होरें आखेआ ऐ जे राष्ट्रपति डोनाल्ड ट्रम्प हुं दे नेतृत्व च अमरीका प्रशासन इक ऐसे बहु-धुवीयता आहली बवस्था बक्खी अगड़ा बधै करदा ऐ जेहड़ी भारत दे हितै च ऐ।
4. अमरीका नै यूक्रेन गी फौजी सहायता रोकने दे कन्नै गै खूफिया जानकारी सांझा करने पर बी रोक लाई दित्ती ऐ। अमरीका दी एह गैहरूस-यूक्रेन जंग गी खत्म करने दी अमरीकी योजना दे तैहत यूक्रेन पर दबाऽ बनाने दा हिस्सा ऐ।
5. युवा मामलें ते खेड्डें सरबंधी मंत्री डाक्टर मनसुख मांडविया होरें ऐलान कीता ऐ जे खेलो इंडिया पैरा गेम्स 2025 दा आयोजन नमीं दिल्ली च औंदी 20 थमां 27 मार्च तक कीता जाहग।
6. आईसीसी चैंपियंस ट्रॉफी दे कल खेड्डे गेदे दुए सेमीफाईनल मुकाबले च न्यूजीलैंड नै दक्खन अफ्रीका गी हराइयै फाईनल च थाहर बनाई लैती ऐ।

<><><><><><>

Vaishnav Kedarnath

सरकार नै 12.9 किलोमीटर दी लम्बाई आले सोन प्रयाग थमां कैदारनाथ रोपवे दे विकास लेई मंजूरी दित्ती ऐ। नमीं दिल्ली च मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे इस प्रोजेक्ट दी कुल लागत 4 जहार करोड़ रपे थमां मती होग।

<><><><><><>

PM Uttrakhand

प्रधानमंत्री नरेन्द्र मोदी अज्ज अपने इक ध्याड़े दे दौरे पर उत्तराखंड दे उत्तरकाशी पुज्जडन। स्याले आहले सैलसफा गी बढ़ावा देने दे मकसद कन्नै प्रधानमंत्री हुंदी एह जात्तरा मती महत्वपूर्ण मन्नी जा करदी ऐ। प्रधानमंत्री होर मुखवा च मां गंगा हुंदे शीतकालीन प्रवास दे दर्शन ते पूजा अर्चना करडन। श्री मोदी होर ट्रैक ते बाइक रैली गी रवाना करडन ते हर्सिल च जनसभा गी संबोधित करडन। उत्तराखंड सरकारै इस ब'रे स्याले आहले सैलसफा मतल्लक कार्यक्रम शुरू कीता ऐ। ज्हारें श्रद्धालु गंगोत्री, यमुनोत्री, केदारनाथ ते बद्रीनाथ मंदरें दे देवी-देवताएं दे स्यालें आहले प्रवास स्थलें दे दर्शन करी चुके दे न। इस कार्यक्रम दा उद्देश्य धार्मिक पर्यटन गी बढ़ावा देना ते मुकामी अर्थबवस्था दे कन्नै गै होम-स्टे आहली बवस्था दे विकास च बी तेजी आहनना ऐ।

<><><><><><>

Jaishankar US

विदेश मंत्री डाक्टर एस. जयशंकर होरें आखेआ ऐ जे राष्ट्रपति डोनाल्ड ट्रम्प हुंदे नेतृत्व च अमरीका प्रशासन इक ऐसे बहु-ध्रुवीयता आहली बवस्था बक्खी अगड़ा बधै करदा ऐ जेहदे च ताकत अखित्यार ते रसूख दे इक कोला मते केन्द्र हुंदे न। उ'नें आखेआ जे एह बवस्था भारत दे हितें दे अनुकूल ऐ। डॉ. जयशंकर होरें गलाया जे राष्ट्रपति ट्रंप हुंदे नेतृत्व च अमरीका दी विदेश नीति च बदलाव दी मेद पैहले गै कीती जा करदी ही ते एह केई मायनें च भारत दे हितै च ऐ। विदेश मंत्री होर कल सं'ज्ञां लंदन दे चौथम हाउस थिंक टैंक च 'भारत दा उदय ते दुनिया च एहदी भूमिका' विषय पर इक सत्र गी संबोधित करै करदे हे। डॉ. जयशंकर होर बरतानिया ते आयरलैंड दी 6एं दिनें दी जात्तरा पर न। विदेश मंत्री होरें आलमी सतह उप्पर बदलदी बवस्था, ऊर्जा, तकनीक ते कनेक्टिविटी सरबंधी पैहलकदमिएं दा हवाला दि'दे होई आखेआ जे अमरीकी राष्ट्रपति ते उ'दे प्रशासन दिआं केई प्राथमिकतां भारत लेई नमीं मेदें कन्नै भरोची दिआं न। कश्मीर च मुहें दे हल बारै इक सोआलै दा परता दि'दे होई डॉ. जयशंकर होरें आखेआ जे दफा370 गी हटाना पैहली गैह ही, कश्मीर च विकास ते आर्थिक गतिविधि ते समाजी न्याऽ गी ब्हाल करना दुई ते बड्डी गिनतरी च मतदाताएं गी चुनाएं च शामिल कराना त्रीऽ गैह ही। उ'नें आखेआ जे भारत, कश्मीर दे ओकड़े हिस्से दी वापसी गी बलगा करदा ऐ जेहदे पर पाकिस्तान नै अपना नजैज कब्जा करिये रक्खे दा ऐ। विदेश मंत्री होरें आखेआ जे जिसलै ऐसा होई जाहग, तां कश्मीर दा मुद्दा हल होई जाहग। चीन दे बारे च डॉ. जयशंकर होरें आखेआ जे अक्टूबर 2024 थमां

किश सकारात्मक गतिविधियां होइयां न, जेहदे च तिब्बत च कैलाश पर्वत दी तीर्थयात्रा आह्ला मार्ग खुलना बी शामिल ऐ।

<><><><><><>

Trump Canada

अमरीकी राष्ट्रपति डोनाल्ड ट्रम्प होरें कनाडा दे साबका प्रधानमंत्री जस्टिन ट्रूडो होरेंगी आखेआ ऐ जे टैरिफ दे बाददे गी रोकने लेई उंदे आसेआ पुट्टी गेदी गेंहीं ठीक नेई ऐ हि'आं। कनाडा ते मेक्सिको राहें अमरीका च औने आहले समेयानें उप्पर 25 फीसद टैरिफ 4 मार्च गी तय समें उप्पर लागू होई गेआ। अमरीका आसेआ चीन थमां आयात पर 20 फीसद टैरिफ लाया गेआ। ट्रम्प होरें गैर-कनूनी प्रवासियें दे अमरीका च दाखल होने लेई कनाडा ते मेक्सिको गी दोषी करार दित्ता। उ'नें चीन गी एहदे स्रोत दे रूप च रोकने च नाकाम रौहने लेई ओहदी निंदेआ कीती।

<><><><><><>

US Ukraine

अमरीका नै फौजी मदाद रोकने दे कन्नो कन्नी यूक्रेन कन्नै खुफिया जानकारी सांझी करने गी बी रोक दीत्ता ऐ जेहड़ा अपनी सरकार गी रूस कन्नै मुख्य दी लड़ाई गी खत्म करने दी व्हाइट हाउस दी योजना कन्नै सैहयोग करने लेई मजबूर करने दे दबाह अभियान दा इक हिस्सा ऐ। सीआईए डरैक्टर जॉन रेटक्लीफटे ते राष्ट्रीय सुरक्षा सलाहकार माइकल वाटज होरें दौनें खुफिया समर्थन च रूकावट दी पुष्टि कीती ऐ। पर सुझाह दित्ता ऐ जे जेकर यूक्रेन तौले गै गल्लबात द'मेज पर वापस आई जंदा ऐ तां एह थ्होड़ी चिरै आस्तै बी होई सकदा ऐ।

<><><><><><>

US Hamas

अमरीका दे राष्ट्रपति डोनाल्ड ट्रंप होरें हमास गी सख्त चेतावनी दि'ंदे होई आखेआ ऐ जे उसी गाजा च सब्भनें बंधकें गी फौरी तौर उप्पर रिहा करी देना लोड़चदा ऐ ते कन्नै मारे गेदे लोकें दे शव बी वापस करने लोड़चदे न। श्री ट्रंप हुंदी चेतावनी नेह समें पर आई ऐ, जिसलै अमरीका नै इस गल्लै दी तसदीक कीती ऐ जे ओह हमास दे कन्नै सिद्दी गल्लबात करै करदा ऐ। एह गल्लबात अमरीकी नीति च स्पष्ट बदलाव गी दर्शादी ऐ। श्री ट्रंप होरें

हमास दा खात्मा करने लेई इसाइल गी हर मुमकन मदाद देने दा वायदा कीता ते आखेआ जेकर हमास बंधकें गी रिहा नेई करदा ऐ तां ओहदा इक बी सदस्या सुरक्षित नेई रौहग।

<><><><><><>

Pak Blast

पाकिस्तान च कल अशांत ब्लूचिस्तान प्रांत च इक बजार च धमाके च घट्टोघट्ट चरुं लोकें दी मौत होइ गई ऐ ते 5 होर जख्मी होई गे न। पुलसै नै दस्सेआ ऐ जे खुजदार दे नाल बजार च खड़ोती दी इक मोटर सैकल कन्नै इक आईईडी लाया गेदा हा। नाल पुलस थाने दे एसएचओ खान पिडरानी होरें मीडिया कन्नै गल्लबात करदे होई जख्मी लोकें चा इक दी हालत नाजुक दस्सी ऐ। खुजदार दे एसएसपी जावेद जेहरी होरें दस्सेआ जे इस धमाके च किश गड्डियां बी तबाह होई गेइयां न। इक ब्यान च ब्लूचिस्तान दे मुखमंत्री मीर सरफराज बगतीहोरें इस धमाके दी सख्त अल्फाजें च निंदेआ करदे होई आखेआ जे जख्मी लोकें गी बेहतर इलाज मुहैया करोआने दे हुक्म जारी कीते गे न।

<><><><><><>

Khelo India

युवा मामले ते खेड्ड मंत्री डॉ. मनसुख मांडविया होरें एलान कीता ऐ जे खेलो इंडिया पैरा गेम्स 2025 इस म्हीने दी 20 तरीक थमां 27 तरीक तगर नमीं दिल्ली च होंगन। खेलो इंडिया पैरा गेम्स दा एह दूआ संस्करण होग।

<><><><><><>

ICC-Champions Trophy

आईसीसी चैंपियन्स ट्राफी 2025 च न्यूजीलैंड नै कल रातीं लाहोर दे गद्दाफी स्टेडियम च दुए सैमीफाइनल च दक्खन अफ्रीका गी 50एं रंजें कन्नै हराने मगरा भारत कन्नै फाइनल मकाबला खेड्डने लेई तैआर ऐ। न्यूजीलैंड आस्सेआ तैहशुदा प्रतियोगिता दे इतिहास च अजें तगर दे सारे थमां मते 363 रंजें दा पिच्छा करदे होई दक्खन अफ्रीका 50 ओवरें च 9 विकटें दे नुकसान च 312 रंज गै बनाई सकेआ। दक्खन अफ्रीका लेई डेविड मिलर सौ रंजें कन्नै नाबाद रेआ। तोआई मंगलवारें भारत नै दुबई च होए दे पैहले सैमीफाइनल च आस्ट्रेलिया गी 4 विकटें कन्नै हराया ते प्रतियोगिता दे फाइनल च दाखल होई गेआ।